

笏

庵

詩

吳氏一家稿

笏庵詩七

錢塘 吳清鵬 程九

壬辰

訪友

繫馬修竹門不見主人出却繞荷花行始聞有客奕主人方坐觀三子同一石我來亦無事茶瓜留竟日瀟灑類洞府分明遇仙客乃知炎蒸苦別有清閒適雨過水亭秋蟬鳴風樹夕久倦欲告去歸路滿涼月

送韓補亭

鳳修

同年之官粵東

羣邑近凋瘵越南猶舊邦須爲限銅柱莫愛泛珠江我

更無他贈君惟盡此缸如逢樂昌吏好與說家瀧

樂昌有韓

瀧以昌黎得名而補  
亭韓姓故稱爲家瀧

### 苦旱行

六月猶未雨旱自四月來屯膏失下濟蒙咎久上乖田  
園盡焦土晝日常風霾渴林鳥張口涸池魚曝鰓兒童  
拜井看父老登隴哀蒼生不可救 聖心屢殷懷恭聞

六事責庶反三靈災郊壇亦勤矣牲璧何虛哉已密西

郊雲空殷南山雷吁嗟周雅什寂寞商霖材丞相自請

免

時太學士富  
公上書請免

羣司胥候裁

小臣

負言職曷對清憲臺

魯巫不足焚齊寃豈尙埋

時有  
清埋庶獄

晨起望四野夜坐

觀三台徒此蟻忱苦幾時 龍顏開

答鍾元甫

汪杰

同年壽陽邑齋詠懷

丙科向百人十一出爲宰遠或去滇蜀近則游晉代遠

者無消息近者尙好在昨枉太谷書

謂孫子升同年

供億困煩

殆時有西師過奔命不得怠今見壽陽札亦爲此出悔

低顏下色地昔恥今可每顧我北斗旁虛名亦何采平

生志願違卽日鬢鬢改向子願游嶽謝客思帆海何時

覓桃花有約期蘭茝

文信國琴

龍戰中原沸血腥獨攜三尺歎飄零殘山賸水孤臣淚

多見言卷一  
地老天荒帝子靈絕調怨沉燕月白餘聲怒捲浙潮青  
平生一物俱千載好伴橋亭玉帶銘

納涼客有談六合者

參之莊說妙汪洋暢以鄒談更渺茫倚杵直須觀一瞬  
連環似已解中央風行滿架蟲聲樂露下空階草意香  
我只目前能領畧且看斜月轉西牆

寂寞

寂寞揚雄宅無人載酒過池光翻日竹牕色嫋風蘿水  
鼠浮歸穴沙禽睡蹙窩誰知用心苦近頗學陰何

秋熱感懷

久旱作微雨溽蒸氣愈悶五行咎成僭六月卦守遯秋  
扇免捐棄夏簟增繾綣竟日但思浴終夕不能飯吾徒  
自深居一室劇煩溷矧彼流離子燕趙難具論他鄉就  
食苦兒女載塗頓暈死委溝瀆倉卒飲餘恨嗚呼造物  
仁曷忍視久困誰能起雲師沛然賜尺寸

新庶常來見多少年者

白簡傳深閣紅毡拜小墀敬修前輩禮秀發少年姿  
耳行俱速蛾眉嫁不遲廿年余已悔容易到蓬池

秋懷十首

桃李笑豔陽和樂自一世繁華雖不長春風有仁氣芙

蓉可憐色未花已憔悴籬菊秉高節亦委嚴霜厲時命  
豈敢怨天地滿秋意

落葉不可止庭樹漸如東西風日夜緊榮悴何太速我  
家本素封今也坐窘蹙堂前散浮客堂下汰冗僕搜括  
已畧盡計較愈不足念此內傷感江河恐難復

繁霜殺衆草靡靡多未化衝飈折孤花冉冉獨不借翹  
首望太清前星光出乍明月起我愁淚下忽如瀉仙人  
王子晉白鶴無還駕緱山渺何處寂寞吹笙夜

武王耆大難末年寄委裘九畝得公袞卷阿美來游爰  
閭會萬國明堂朝羣侯嗣服起冲幼卜世何綿悠日月

繼高衢天道常眷周乃知魯女嘯倚柱浪自憂

詳國所語

恐爲丈夫多貽婦人羞

此合上首與前啼烏曲參看

六氣失宣淪久疾耗元氣雖無腫盤患漸恐成羸瘵藥  
有百毒腸醫無九折臂方士復悞我急效收猛劑金石  
豈不速一發禍愈熾

截榆承金盤風大不可支續帶下銀瓶水深將安施分  
明備灑埽倏忽秉旌麾不惜南海珠恐辱東山錡小人  
常滿志矜喜不自持焉知君子心日夕生憂危

胥吏丞相茵優伶上公服貂狐日常御寶馬道飛逐卽  
事坐亡等舉隅見奢欲此輩亦何責太息舊風俗禮法



百年在威儀九品肅從來尙儉德軌度受納束焉得示  
之禁羣聽未可瀆

偶覽高士傳始善萊妻謀酒食取鞭撻高位良可憂  
我漢執法豈恕公與侯將軍繫對簿丞相拘下囚不堪  
廷尉辱仰見獄吏羞縱幸得歸去老作農圃儔子孫免  
爲庶田里多見收何必雍門彈淚爲身後流目前只便  
爾富貴何所求

皆當時  
實事

愛菊陶潛去思萼張翰歸二子秉高識諒非世所知吾  
亦懷故園正及秋風時徘徊未果志貪戀實昧機舒卷  
固在我或不到晚迷

斯文信吾病愛之歲月勤諒無大雅製風刺道不存愁  
爲怨楚調或亦謫仙人文侯倦聽古葉公懼好真耳目  
自彼囿時命非我屯死日見是非貽之待千春

閨重陽日集家紅生

葆晉

舍人寓宅酒後登閣

望西山追和陳紫瀾先生原韻蓋先生官楚時  
以贈舍人尊祖者七十七年矣

孟公楚北重陽社今日長安復此閒往者尊前逝東水  
我來籬下見西山酒場絕續百年內花事扶持一月間  
誰似前賢才不愧流傳詩思滿江關

曉行書懷

山月墮清影海霞吐朝氣雲峯暗沉沉露樹光泥泥參  
差谷鳥飛喋唼溪魚戲稍見樵理擔遙聞漁鼓柁謀生  
各有營學道亦求濟計閤終無成形役徒爲瘁稷契不  
易許沮溺非吾事將窮觀古心庶竟束髮志

送魚竹給諫謫居張家口

小人甚無厭共事誠所難君子自不負獲罪亦我安梁  
獄已見明漢法猶未寬詎免出北門幸未幽南冠郊原  
落日晚行子戒征鞍此去雖不遠關塞有餘寒努力慎  
保軀勿遽摧心肝行滿三年役當贖千金還

凡坐臺者  
滿三年得

納金  
收贖

武內闈監試呈陳石士閣學朱茶堂副憲兩試  
官

霜月動簾幙寒風颭襟裾重門下管鑰一篇校孫吳燕  
趙古多奇出將蓋有餘選良盡六郡角壯皆百夫 朝  
廷設科意尙思進之儒諸士所呈卷不出一手摹公堂  
坐無事難燭看官奴賤子更何作煮茗竹風爐願公且  
無睡其一詠免冒想見鵠袍子亦有望燒魚

和八兄生子

累姊騎翻階下鞚背母倒盡牀頭甕我有嬌兒最愛憐  
幾年不見勞歸夢渠兄次第項領成苦要催人婚嫁其

小時親密大時疎漸看蜂房出分衆吾兄亦是望歲人  
纔過小滿愁芒種平生向禽游嶽願未知此脚何時縱  
若使年生復一雛應得九雛將一鳳也怕添丁惱阿翁  
索抱看花老無用

慈仁寺松

慈仁寺前雙古松老幹已盡惟稚龍漁洋山人久仙去  
百年冷落如廢宮我訪宣南秋已晚時有殘僧松下飯  
數尺纔看爪鬣張小聲學作寒濤卷舊聞日下今餘幾  
前輩風流亦已矣他時誰識我重來摩挲獨坐松根倚

簡黃生

滌倒黃生老可憐著書閉戶動經年已憑莊論能齊物  
時復騷愁欲問天歲晚飛書頻乞米家貧好事與分殮  
兼旬風雨吾憂甚一訪應須裹飯前

送凌東園

泰封

同年守浙

蓬萊故人載酒過別我去聽五袴歌我問東行亦何意  
笑言一念過新羅知君豈厭承明住滿眼蒼生望君去  
百年自須任世憂一官終莫爲儒腐但使小民歌杜召  
何妨太守有蠻素我惜西湖西子同而今膏沐待誰容  
南屏歌舫白日盡西泠游騎青春空煩君五馬再雕飾  
往繼蘇公與白公

題友人聽琴圖效初唐體

友有姬人善琴

蘿月欲出松風生重樓夜靜雲不行中有名姝彈綠綺  
左攏右撚俱有情五絃指法君家內當時不用師曹誨  
友人姊亦善琴姬人卽姊婢也十三學得廣陵成琵琶羞說延年妹長  
成益自可人憐值得明珠作聘錢渡口迎歸桃葉楫囊  
中載得綠珠絃偶來並坐焚香起腕下泠泠散宮徵先  
彈淥水後湘妃果然不是人間指從此文園慰所思花  
階月館夜遲遲不須更怨知音少自有閨中鍾子期

觀演劇二首

長生殿

常疑漢武笑唐明一爲多情一寡情趣去未憐鈎弋死  
重逢還望玉環生

馬嵬坡

漢武末年多自悔明皇當日亦英姿馬嵬大夢曾無覺  
腸斷淋鈴一曲癡

癸巳

觀羣兒搏雪爲戲

羣兒見雪如見酥忍凍不顧冰肌膚襟兜袖裏走來去  
須臾堆滿庭四隅大兒聰明心性巧貌得白足南海圖  
小兒學作強解事亦能刻畫牟尼珠已綴銀燈連九梳



更起玉塔高丈餘魚龍瑣碎鱗甲活獅象臃腫牙爪粗  
裝成拍手要人看牽帥出門煩老夫老夫豈是少年日  
焉能助兒相戲娛手遲脚鈍腰骨硬下階滑倒兒笑扶

圓明園內閣朝房見壁間紅藥圖有感簡祝雲

颿春熙閣長

昔吟紅藥篇豔羨我心絕今見紅藥圖感繫不可說黃  
扉翼丹禁地分本清切鳳凰在池上凡鳥不敢入雖無  
漢署香爐熏候司夕誰遣斯竈輩割占到庖湑蔽露失  
清芬桐雨下愁滴遂令青瑣郎襪被愁入直近聞賢閣  
長作事甚豪傑，鑾輿駐大內園囿多暇日興廢復前

觀嘉惠及同列謝公翻階枝忽落在粉壁數叢亂風態  
滿座爛霞色寫生如有神見似已可悅尙嫌地使然左  
右限逼迫何年金帶容眞見玉墀側

和詩船芍藥歌

時詩船督運  
泊舟潞河

四月未來三月頗坐對餘春惜妮嫫傳聞一雨霽豐臺  
紅溼千枝萬枝彈佳人蛾眉意似雲公子鳶肩色如火  
城中走馬欲無人市上閉門惟有我豈知君亦被花惱  
看花欲出無人可轉想年年花發時尋常不受東風鎖  
花間我欲繞百匝酒裏君能堅一坐潞河去此帶水耳  
幸語船人休懶惰君看昨夜風色惡似欲困此一笑嗟

曉來旛脚向空擲未覺天公肯哀憫明朝憔悴益可愁  
只恐紛紛遂飄墮倘如早晚便能來尙爲韓公留一朶

送陳登之

延恩

司馬之蘇卽題其罷讀圖

陳子作書有家法陳子治經有世業經傳夾漈得精貫  
書逼香光不孱怯半生地上閒騏驎自悲無路出風塵  
行趨大尹候手板已舍進士燒頭巾君不見玉堂天上  
亦何人風淒月冷耐苦辛十年不調嗟仰屋一麾出把  
賀在門方今重外不重內采薇使勝天保臣憑君且訪  
梅福里爲我一澆要離墳江山相待自須去梅花正滿  
橫塘路

曉入一園甚清麗

紅樓隱霧曉芳園含雨清  
重局忽不鍵偶入得閒行  
松下響猶滴花間煙已生  
絕澗飛橋跨錦石細路成  
遵岸見馴鹿隔院聞調鸚  
逡巡怯深步凝望增餘情  
恐疑主第貴或是侯家營  
微風自中起時送環珮聲

題潘星齋崑山紀游圖二首

古寺中峯外危亭絕壁間  
如經鹿城路來看馬鞍山  
法曲常時妙名園幾姓閒  
故鄉重回首知子未能還  
九峯茲最小驚代有才名  
妙絕楊老鐵風流顧阿瑛  
傳盃山館靜吹笛水樓清  
我欲呼之起君應共此情

奉簡海帆太常二首

時奉命龐  
谷莊賑饑

太常奉 詔籌荒出龐谷宣勞走馬來  
馮翊扶風畿輔計皇華四牡使臣才  
不應甘霖分龍隔尙帶饑聲過雁  
哀賴是大農能繼粟發棠數請未封回

支持四野起瘡痍尙恐春農或失期  
風挾樹聲常竟日雪殘麥隴已多時  
似聞下士談平準莫倚齊民願助施  
旱氣未消憂未減急應爲畫久長規

春水有懷二首

一冬寒水減清澄春至潛生日漸增  
峽勢到江翻蜀雪河聲動海下秦冰  
頻來浴鳥晨呼渚時有跳魚夜上簷

南去吳潮應已滿便思歸買小舟乘

桃花三月復春痕昨夜重添尺雨渾南浦黯然傷別緒  
武陵不見隔仙源深竿拂碣沉絲短細篴通階瀉竹喧  
料得幽棲足高致有人話我在衡門

和徐石林

夔典

孝廉淮陰感懷之作卽題其三

### 十五歲小像

徐子飄零常乞食忽驚三十五年身伍胥市上愁歸晚  
石林久寓吳門韓信祠邊恨別新麥飯久虛寒食祭梅花空繞  
墓門春何當共埽秦亭下余亦東西南北人

### 書東城廳事

皇都觀萬國詰旦開九閫五城十二衢內外夾相望地  
廣財貨聚民稠姦宄藏赫赫金吾衛肅肅京兆堂 朝  
廷設官守豈曰非周防京師五城御史與步軍統領順天府皆聽受民獄訟更遣  
諸御史所以考其詳東城適承乏才薄愧所將日出坐  
廳事訟牒紛雨忙堂上出歌飲堂下來倉皇豈伊盡無  
辜於法固有常我始親鞭笞惻然哀以傷睚眦成怨府  
飲食起敵場念此亦微細何苦生譴張諭令且歸去或  
悔涕彷徨邇覺吏事稀益知人性良狎玩恐不免吾心  
實慈祥

送卮甫南歸卽題其樂志園

荆甫樂淡交粹然儒色溫學從大人立跡與靜者論久  
恩厭朝市獨往思邱園已慕張邴合益抱顏閔存靈靈  
原日晚析析林霜繁白駒謝維繫黃鵠游飛翻余亦秉  
微尙多營坐牽援卽理念方勝涉情慮已喧虛愜浴沂  
想空賞游濠言申章停來報庶釋吝與煩

晚坐

羣動亦勞止殘陽忽下林惜開花自斂倦出鳥相尋地  
通池光蹙天垂幔影深終朝書卷裏暫復息吾心

獨夜

露寒侵徑蔓風勁折簷枝鳥宿危相戒螢飛暗不欺南



江船到少西極馬來遲萬事能無責深慙朱鷺詩

懸蘿釣渚圖

圖本水經  
沅水註語

沅水入夷望南經蓋千里月池旣澄澈石澗亦娟美東  
得綠蘿山蒙羈益可喜上有欲墜崖下有微瀾水日落  
杳冥合風動沖融起猿挂翠屏外魚游清鏡裏想見山  
中人於焉樂棲止吾思買橘洲亦欲采蘭沚頗聞漢將  
軍南征昨歸矣應有楚漁父擘舟葦間俟

送成蘭生

世暄

同年出守懷遠

鵬鵠不受羈氣與秋天杳成公抱遠志飛舞出蓬島初  
陪吳興館風流見管趙再奉西湖游荷花候坡老中間

又小別夢路空迷繞昨來對便殿溫語霽 天表五馬  
復怱怱行色悵初曉懷遠古夏地萬里壯邊堡長城限  
中外黃河瀉清浩黃河水至懷遠獨清楊柳羌人家蒲桃漢使道  
往者事西師茲焉備旌葆於今廓清夷內首樂馴擾葉  
河旣解嚴花門願求好遠算罷儲胥前軍休招討太守  
得餘清斯民可啄菹困野有鬪獸驚林無安鳥多防甚  
壅川無患在偃草行矣慎所施歸來建麾旄

蘇兆熊提帥廬山訪僧

蠻江初罷府廬嶽遠尋師晚跡閒頗牧元談愛惠支安  
禪龍性擾聽法虎心慈已識封侯妄何勞嘆數奇

月

朔風吹旅思孤月滿長安河漢辭秋遠關山動夜寒湛  
霜逾皎皎照水自團團欲寄鄜州作愁添淚未乾

簡奎葉林

磨

侍御

時同巡  
視東城

聞君說我向人知飛判爲書似穆之母乃豐干好饒舌  
何須渾沌更書眉傾城西子誰宜笑混世東方豈爲飢  
莫信上車常不落昨宵睡美失朝期

送友之楚

吳市逢君宿暮天燕臺別我話殘年此行恐作蘆中士  
不薦徒知柳下賢黃鵠樓高風亂笛白沙湖闊月明船

愁來不必爲長句北雁歸時寄一箋

郊行遣懷

先生頭白意皇皇料理千秋覺太忙  
愁得後成靈運佛悔教早嫁汝南王  
林梅泛雪舒舒綠澗竹留風析析黃  
此景城中那易得急須收拾付吟囊

簡歐陽生

世人何倏忽之子獨艱難失計操齊瑟  
違方載越冠欲歸羞季子强笑對長安  
且莫傷遲暮梅花正歲寒

獨坐

獨坐益多思愁來欲上顏寒林孤日落  
微雪亂禽還歲

歎懷鄉切家貧得食艱老妻書數報累汝守柴關

### 虎城行

繚垣石築門關重鐵網星絡周圓穹虎奴胡兒眼碧瞳  
日來餵虎肩氣供年年大狩十月冬出載校獵觀成功  
羽林健兒百隊從手握元武驅豐隆上亦戎服韜臂  
弓晾鷹臺上簸旗紅殺虎將軍膽氣雄馬前突出來開  
籠須臾虎怒觸籠出驚沙走石生狂風萬人肉上起寒  
栗百馬倒退皆瘖聾是時圍中氣肅寂如水將軍持鎗  
伏伺同眼明手捷故不下欲以掀撲觀其窮左旋右逼  
地勢迫頭鎗一起剛著曾拜呼獻獲賀臺下上顧一

笑恩賞濃仁追義殺不盡取落日未半回翠龍倉卒曾  
無銜檠慮豈有諫書煩臣工今年天寒大凍裂罷獵不  
到甘泉宮虎奴閒坐虎城守汝勿多言學利口

寄答三兄

長安夏熟今年好可惜甘霖不繼來麥種未曾秋後下  
梅花枉用臘前開差欣山左連冬雪又怪江南十月雷  
正盼故鄉消息到不堪重訴雁聲哀

甲午

簡友

惡影不如弗行止謗莫若無辨九關守虎豹一室起雷

電方其初盛時倏忽勢千變徐徐俟其怠雨止雲亦散  
乃知小人態不爲君子患石激火愈熾水激浪愈煽所  
以慈妙容不鬪魔力健惟當寂滅中付之不聞見

讀漢循吏傳

庭昏壓層陰夜冷下微霰孤燈照愁思起讀循吏傳漢  
治差近古秦後蓋一變非惟相清靜豈獨主慈儉時平  
庶事理運泰衆材獻上下不煩苛公私有蓄羨禮樂雖  
未遑囹圄多虛鍵惜哉文景後稍復尙嚴健尙賴十數  
公先後史筆顯才難兩朝盡政美一世善嗚呼三代治  
必用聖門彥閭洛不再出儒吏無由見龔黃何時生庶

用慰懷眷

行年

行年四十九自顧我猶吾禮法常逃嬾詩書不破愚感  
時虛歎李太白有四十九歲感秋詩寡過實悲遽尙有無窮意斑斑  
數然鬚

送徐生之熱河

送子渡關去棲棲別路長一春殘雪積幾處陷沙妨失  
晚駝聲圓迷晨免跡迹灤河讀書地艱苦且須嘗

聞友人述金陵之游

憶昔初發龍潭郵樓霞一塢藏清幽山竹留雲見僧寺



江蘆卷雪來漁舟明朝遂走白門道形勢一變爲雄道  
孝陵鎖帶自佳氣鍾阜盤踞當高秋二年留住日多暇  
地主頗煩車與歐雞籠絕頂候曉日燕子半面窺江流  
長干塔峻下黃鵠元武湖荒起白鷗歸來落日尋古邱  
白楊蕭蕭生暮愁清涼山下屢勾留五月不熱寒颼颼  
隨園營置乃巧偷借山爲屏渠作溝當時流覽得大概  
自謂已盡無他求豈知遺漏尙十八今始獲之以耳游  
秣陵固自有佳境不造細處吾已浮他年歸舟會重過  
定留百月窮探搜要求吾子足跡未到處更誇一二聊

相酬

同人出郭偶成

萬壑刁騷廣樂鳴一溪湫澹絕塵清風行著物皆天籟  
水鑒於人不世情始覺容非諸少比緣知詩未自然成  
假年若許從吾好多識蟲魚草木名

小閣

小閣登臨送目遲一春懷抱與誰知風花嫋娜將辭樹  
雪水侵陵已滿池牽狗東門聞太息跼鴛西里見讒疑  
細思將相多如此高位從來自可危

簡秋士

時秋士及門  
多散去者

貧賤爲師覺道輕感君寂寞一春情桃花好逐楊花舞

山鳥何嗔水鳥鳴陳相之滕從許子李斯去楚負荀卿  
孔門亦有三盈之不惑惟聞陋巷生

倚樓

獨倚高樓首屢搔天時人事兩相遭一春得雨初栽麥  
三月多風未放桃忍向東人責漿珮苦聞南國戛弓刀  
盛朝未必關憂慮坐覺書生氣不豪

雨後過松筠菴

幻從虛處作喧復寂中歸驟雨翻花定殘雲帶鳥飛微  
涼生晚市清梵出禪扉爲訪高僧語衝泥未惜衣

贈陳生

簞竹林深瘴霧埋檳榔嶺峻劃中開誰知

從事

曾向南山喻賊來

答友人湖上見寄之作

六橋三月春風顛管領花鳥須新篇故人書來有勝事

意在元和元祐間却嫌一語劇嘲謔何至謂我如坡仙

已掃閒地

西湖有閒地菴舊祀東坡先生

作壇社要令斬伐專其權鄙

人於此本兒戲如沙聚塔散復搏念君攻苦十倍我木

鑽鑽石何時穿寸心得失要自燭唐突詎可誣前賢孔

融縱有典型愛周顗未受刻畫憐湖山且付君作主正

有裘屐交翩翩他時歸來一握手與君放眼三千年

聽琴

枇杷門掩西風裏月明夜靜琴聲起大絃憤激小絃愁  
此聲豈合來青樓我知此女定流落薄命傷心爲此曲  
樓前竊聽衆莫狂不彈淥水彈履霜

余將迎妻子北來三兄有詩寄示次韻

差免龍蛇困數奇頗遭猿鶴笑文移一官濫許陪張敞  
五十驚看老戴逵愁感蜉蝣頻嘆室喜占烏鵲尙需時  
却添一別鴿原淚說與西風故國悲

霸州刺史姬

均

以霸州志見寄讀畢有感

戰國山河舊跡多霸州人物渺如何一篇惟有金華賦

千載青樓得李哥

家梅梁

傑

京兆重陽日送酒

吾族多賢貴君又起德門籍籍京兆聲張趙不足論余  
謬忝同官不能常君親愚智事非一語默性所存祿入  
猶秉耒官居仍插樊匪是慕高尙養拙好邱園君知我  
意懶勅事弗復關豈惟寬禮數時又致殷勤辱蒙黃花  
節遣送白衣樽空慙陶淵明未歸柴桑村冀酬醉飽惠  
聊吐平生言

余巡視東城時吏目王

用楫

素有傲志一日爲

人所訶斥繳印求去余挽留之未幾仍以疾乞

歸於其行也爲誦山色不如歸意濃之句且效  
東坡作詩送之

小鳥懼彈射羽毛還自矜曾爲三語掾不待六安丞棲  
棘憐才屈哦松喜句能青山歸興發慙愧記吾曾

十月五日校射武闡與梅梁京兆同寓心華寺  
越日京兆以奕太素貝勒詩十章見示且謂太  
素屬以示余感其見知如其數答之

孟冬景候肅馬驕士氣粗 詔命屬親賢校射集上都  
屯騎滿近郭列帳夾廣塗下秩忝陪位始習覽穰苴  
兔豈養賢才大風思猛士從容造次間王霸固異耳糾

糾幽并兒中有干城美及時正閒暇可進觀角技

飛鞚下馳道虛絃響抨弓旗鼓惑視聽左右善欺蒙馬

嘶落日晚鳥下閒原空告歸每獨後才拙限所窮

來詩有事

熟生暇  
豫之句

晨出德勝門暮宿心華寺初月出已落清燈照無寐回

思鼓角競轅門餘猛氣未作愛支許喧寂境自異

禪房花木靜氣暖得娟好今日稍休暇可以寄清嘯賞

幽趣已多情孤興猶杳誰能起余者京兆吾宗老

京兆善說詩詩固不浪作沈鮑意未愜曹劉始留目以

茲多睥睨於世鮮酬酢忽袖一篇來意外自驚愕



成邸昔雅詠往往似陳思敬愛先君子同直 書房時  
流風被來者王今繼見之賤子何足道慙愧應劉詞  
嗜酒愛汝陽玩月懷漢中杜陵老賓客輕身游王公爲  
士豈不重實慕知己同知己誰不然令我疑所從  
下交自有道上交當何如豈不仰丰采禮數亦已殊王  
事今休役分手卽路隔明日兩不見莫怪嬾曳裾  
曳裾非我志辭醴豈我名明日雖不見寤寐心已傾抒  
誠酬所惠竭慮思未精當令千載後知有今日情

吳氏一家稿

笏庵詩八

錢塘 吳清鵬

乙未

送董通副

淳南歸通副爲文恭公令嗣

董公本健者一跌初未防我持一樽酒出送衢路旁前  
林頽晚日四野浩風霜臨分已多感懷舊况難忘念昔  
文恭公出身濟時康三階夾華蓋八座近文昌白屋下  
寒峻青雲假翺翔小心出謙謹庶事資劬勩維時相業  
盛世濟皆忠良二劉實規隨得公道彌光尙憶 先帝  
日輦轂起非常天狼入紫極野兔窺金牀聲氣連宮掖

燬火徹禁廂皇子自提劍內人多束裝  
鑾輿時在外衆議失倉皇公力勸回蹕涕泣攬  
帝纆天威一奮振神武信光光臨事見謀斷時亦賴杜房至今下馬  
墳人懷白雲岡喜君嗣前哲天衢再騰驤朝廷念勲舊恩意甚減汪病免豈得已告歸何太忙誓將守邱  
墓終老無出鄉余本門下士况復眷梓桑思隨渡江去區區申椒漿臨歧不克偕淚下空沾裳

茶餘詩味圖

道味苦而永世味甘而乍我於世道間咀嚼兩未罷君似知味者而託詩茶假謂詩能清茶茶不待詩下謂茶

能新詩詩豈受茶化我欲就問之君曰姑俟暇去予渣  
穢胸還子神明舍萌芽先天春領畧後子夜歸來坐兀  
兀此身忽無藉不聞一鳥鳴但見萬花亞君看我此詩  
似已土苴謝七椀倘見賞老境出甘蔗

讀青邱集

一代邊徐何李儔先聲正則讓青邱春原濯濯嘉禾秀  
不遭西成到晚秋

讀梅村集

離離禾黍故宮思風刺猶存意可知肯共絳雲賒一死  
直緣忍死爲傳詩

楊花

一年一見楊花落每見楊花感不禁似雪迷離遮恨眼  
隨風撩亂攪愁心貴如亭畔青春晚煬帝樓前白日沉  
千古不堪搖落意分明留怨到於今

五十生日同人以詩爲壽賦答三十韻

四十昔初度憂來獨賦詩羣公還感我今日復銜卮白  
問養無用平生好不羈閒居展戲謔飽食送遨嬉弟子  
嘲師嬾家人笑叔癡自然宜野服不合養天池朝籍名  
雖挂山林性豈移祇增顏益厚未覺位爲尸昨過登聞  
院榮爲參議司承恩殊未已遷秩復於斯濫許陪張

敝何知學賈逵徒妨來者路未免外人嗤休沐偏多暇

朝參未有期

府丞無值班之日

依然閒是好

上

頗覺靜爲宜往

歲移家至長途慰我思勃谿初不作湫隘喜無辭和樂  
能安室從容得下帷風窗亂緇帙雨壁潤琴絲讀史難  
年表臨書愛月儀有時營草閣隨意插荆籬藥圃勤能  
灌魚陂遠未規漢陰機早息濠上樂深知流落風塵易  
蹉跎 雨露私丞哉吾實負逝矣定何時心以爲文苦  
顏知攬鏡衰徒增脫齒責且欲染鬚欺覽揆何勞問知  
非尙自疑衛蘧不易學楚屈倘相追屬詠才俱妙虛譽  
愧益滋報章無盡意老去怕多悲

仕宦至五十戲效樂天畧參東坡亦不純師之意也

仕宦至五十亦可少休息家人不我許恐我遂引決細思實可笑於我竟何益五更起朝天泥滑道路急家人方熟睡我獨冒風雪平明趨公衙日午事未畢我獨忍饑餓家人已早食我苦家人樂我勞家人逸不如竟棄去苦樂轉均一旦勿語家人此意吾當密

送左生

宗棠

下第還長沙

湘沅東合江洞庭北來抱長沙鬱其間秀出諸郡表古來此才藪風流盛文藻左生後時彥射策頗年少書從

倚相讀文解屈賈弔我欲採明月出海看一照惜彼濁

水源渾渾失中道

謂癸巳春聞余薦生而未售

別來今二年子學應

更飽昨於衆客座初嘆一語妙徐爲開其流沛若海勢

浩百家已泛涉輿地最精討行窮南國紀擬作西域考

我覺子所學根據甚精要若人貢玉堂色可壯蓬島胡

爲又一蹶久溷困櫪阜功名亦何物能使人涕笑樂生

始辱魏蘇子終顯趙屈伸賦命定初不受我造哲人守

不惑達士戒無擾洛塵化素衣漢水候歸櫂啼鵲竹娟

娟飲猿蘿裊裊莫愁青草湖好上黃陵廟鄧子吾故人

謂湘臯

孝廉可共寄清嘯閒過秋聲館更訪歐陽老

謂礪東先生



秋士六十賦詩四首以爲壽

達官無公交細人有公識豪門無公到近市有公跡長  
安九衢開冠蓋亂坌集先生方臥起巾韉踏曉日瓶中  
得酒還袖裏抽書出衣食雖寄人道義自我立悔吝不  
復生疾病何從入所以六十人常如三四十

至樂談逍遙無生觀寂滅詩人例老去必用二氏說懺  
悔贖前愆安排養餘息先生初未然似不爲所溺前年  
忽了悟意欲空一切我亦思遁去已築維摩室大道本  
遊戲小德可出入假如果此緣亦足却衰疾應勝營營  
子妄念紛內集

憶昔鄭氏園與君初遇時俱爲依人計並作童蒙師周  
旋復未久我感渠渠詩於今却幾年世事日變移主人  
已仙去白鶴無時歸所遇迭新故焉得不速衰君如捨  
雞肋我亦學馬蹄惟當速料理去去同遊嬉

經術張鼎甫古文梅伯言碩學有根柢二子道自溫君  
於二子外不浪識一人胡然辱及我許以詩過論遂并  
識二子因君見情親昨來聞伯言擬爲君具樽苦無物  
勸侑聊復假斯文我意亦爲此賦詩託殷勤惜哉鼎甫  
去悵隔南天雲安得招與來共樂杖履春

菜堂侍郎我我周旋圖

圖作一老一少相顧狀

百年形骸一畫稿乾坤大鏡孰回照禾中侍郎獨何作  
寫此一幅老與少昔有潘廣文亦曾寫此圖歐陽礪東  
爲之詩見礪東詩稿詩在不知圖有無觀其說我我亦以兩

我論乃知當日潘氏圖畧與此圖同稿本吾聞周旋說

殷浩本對桓溫言其云我我者意蓋以人爲我云按殷浩本

傳作我與公周旋而施註蘇詩引用殷浩傳作我他如

與我周旋二者必有一誤今姑就施註以爲解公子光直云我爾身是又以我屬之人我人人我示我

親不如我我存我真所以歐陽作詩意頗欲以我還天

地我今意又歐陽異但取形骸畫稿說可於吾詩意逆

志

徐貞女 并序

沂水徐氏女許於同里袁振婚有期矣翁死越日  
婿又死族人計分其產無與爲後者女聞益悲憤  
曰是以婿爲未成人也遂麻衣以往曰我來 句汝  
家何以處我衆無以應乃議立婿後嗚呼如女者  
豈獨貞節云哉可謂智勇知所處矣

沂州沂水水清源徐氏之女幼字袁年未二十淑且溫  
懿某月日將合婚初得翁耗心悲煩况乃折我比翼鴛  
哀哉婿又無弟昆一狐竄入羣狐奔擾擾爭奪鬪以喧  
六親不主避仇怨空帷日暮啼哀猿似續無人愁九原

事聞於女益憤寃曰不以婿成人論我不往之絕其殮  
白衣縞裙素車軒入門望望靈之旛升堂拜靈淚河翻  
收淚徐對衆乃言我義旣來誓無反汝家何以我爲存  
衆初謂女可咀吞聞女言乃舌卷捫爰告於廟主蘊繁  
徐請議後安二魂婿則有子翁有孫嗚呼丈夫多負恩  
當其可爲不肯援坐視傾覆憂乾坤危哉一線存孤根  
平勃乃出閨秀門智逾離朱勇孟賁豈獨清節回奔渾  
可使懦立薄者敦

書杜牧之題烏江亭詩後

捲土重來未可知果然能忍是男兒請看赤壁亡歸日

猶是烏江力盡時

又書其秋夕詩後

一篇秋思致纏綿  
曹謝風流未許先  
却問夜涼如水地  
天街何處臥嬋娟

簡龍樹寺悅亭上人

半生墮落誤塵網  
一念之差惟坐妄  
年來盡力去芟除  
猶逐春潮日消長  
差於靜處得安便  
每向名山思一訪  
龍樹逍遙夏日涼  
水蒲搖風作秋響  
近公白雪免炎蒸  
知我紅塵苦迷惘  
明朝踏地便須來  
一爲吾師候巾杖  
也煩遣去與分燈  
且欲收回加喝棒

秋雨有懷京外諸友

孤館與誰度清秋寂坐來高風松子落冷雨菊花開歲  
月驚新杖江湖憶舊盃濟時公等事吾老曷歸哉

嘉定孫雲亭

續

布衣高士也常客游燕齊淮泗

間母老辭歸授徒以供甘旨著有夢溪詩草錢  
竹汀宮詹常與之游梁山舟學士亦多有詩見  
贈今沒二十年矣家貧至不能葬其子壙與余  
曾識於揚以書來告慨然爲書數語付之以示  
同志者亦庶助成此義舉耳

高士無處著隱居東海廬早辭穆生醴力致姜氏魚著

書不求達賦詩聊自娛門有茅容客坐列王褒徒鄉達  
稱老友鄰邦慕碩儒我雖未識面姓氏久可呼嗚呼若  
人亡竟坐歲月徂頗聞中散後未免嵇紹孤無力事營  
葬空山寄靈輿大事難再緩仁人宜其吁誰能助舉鍤  
四海須堯夫

### 望西山

十年住城西不見西山影今朝適東去回首見山頂去  
遠轉得近此意發我省乃知非山遠蔽此一城梗近城  
如近蔽城遠蔽自屏雖然欲至山仍須造西請見山莫  
便喜固是背而騁咄哉勿錯路出城山可景



世勳

表兄泛舟

表兄泛舟

綠楊雲覆津橋沽一舟昔與君歸初清談可以樂永日  
暑月不復憂長途衛河南下三百里隔隄彌望紅芙蕖  
泊舟晚就隄上坐涼風析析吹襟裾分水祠邊看流水  
雪渦盤蹴交縈紆風平水順帆脚穩幾日飽食黃河魚  
平生斯游數最樂別後感往常嗟吁豈知昨夜還把手  
了了君我兩不孤十年清景不留跡一夢追使還須臾  
覺來風響涼秋急起視月落清夜徂細思前游亦夢耳  
此夢何必非真吾寫詩寄君君莫感要問君昨曾來無  
有友自河南來酒間與語河務論甚高

黃河北來不可疆千年一徙數若常至今蓄極在必洩  
其勢又與我爭江長城所恃一高堰震鄰之恐驚淮揚  
羣公念豈不到此如醫知病無其方輾轉計出每愈下  
漢家歲歲營宣房采薪伐石備倉卒料風測水提惺惶  
士有憂者言之長意氣感激聲慨慷試請束水不用防  
便擬棄地亦有場下策無取王延世高論頗借關子陽  
根据甚鑿非杳茫一日要挽千年狂我聞其說不敢詳  
迄自宋元溯漢唐議或不行行未臧惟子之策孰嘗試  
惜抱此志徒鬱傷庭梧葉落秋正涼節候已交九月霜  
且與盡醉累百觴毋以憂患置我腸

落葉二首

昨夜長安霜滿城  
曉來凝望不勝情  
卽看委砌紛紛積  
賸覺空林莽莽撐  
地上蟲聲何獨喜  
天邊鳥意自多驚  
暮年宋玉悲秋甚  
搖落江山感易生

初飛一片覺匆匆  
萬片爭飛勢欲空  
落盡春花猶有綠  
飄殘秋葉更無紅  
最愁哀壑將沉日  
况奈高原數起風  
獨賴後凋松柏在  
支持天地歲寒中

御書印心石屋恭賦呈兩江制府陶雲汀

謝先

生

文思天子憂勤主  
幾餘閒啓圖書府  
一字年年錫福多

大臣於年終尋常不得輕瞻睹未見詞臣籠袖歸豈聞

得賞福字

醉侍登牀取南方諸侯述職來九重許作家人語印

心石屋是臣家臣昔曾經讀書處因賜深宮第一書

雲龍海鶴爭飛舞玉墀親捧拜恩歸嗟嘆人人驚異

數君不見寒松堂清愛堂寶墨傳留照門宇當日

先皇賜老臣清名直節俱千古知公心事如稷禹蒼生

相待應須去定將一紙朝廷意散作江南春萬戶

### 汪龍莊先生遺像

乙科先子之年友小子及見四老人忽忽一戴

紫垣先生又

凋落數年逮及徐

春帆先生

與孫

寄圃先生

邇惟大庾九十老

戴可

亭先生 歲歲得其梅花春十年景疏空在想千里御李知  
無因龍莊先生初未識彷彿四老之精神平生出處見  
大節凜凜風骨今猶存當時若早拜顏色生前杖履應  
更親百年耆舊眼欲盡我今髮白還如銀不愁歲月去  
飄忽但恐後生日異非前聞安得此圖常置座心瑩慮  
潔無由塵今晨熏沐送歸去翹首出門空白雲

祁協亭先生采芝圖

閨門晨開集冠蓋先生不出羞交態吳人未有如公介  
橫塘夜泛圍歌舞先生不過嗟無度吳人未有如公古  
先生之介亦非孤先生之古亦非迂有時鄧尉山前去

飽看梅花踏歸路還向生公石畔來閒把楊枝共僧語  
卽今七十未白頭采芝欲作山中游山中白雲回我首  
分一茅龍許騎否

寄書谷弟

嶢嶢易折戒須嚴碌碌能全道可兼窺豹且容棋局戲  
分鷺莫記射堂嫌近聞妻子寄他食太向交游似汝廉  
愧我年來得溫飽能無風雪憶茆檐

宋徽宗畫唐宮夜游圖

宣和畫品稱神逸御府流傳皆第一可憐鷹馬竭能事  
無逸幽風無一筆明皇初政本清明蛾眉一笑果傾城

後車不鑒前車戒可識當時心已怠嗚呼唐家西幸猶  
及還宋家北狩更悲酸故宮花石傷心麗除是青衣夢  
裏看

讀漁洋集戲題

長白山頭感神女小黃園裏弔昭靈秦祠漢塚知多少  
動費先生脣涕零

丙申

不飲

非我有所戒天然不入脣百年眞俗物一世獨醒人免  
罵將軍座那汙丞相茵且攜團月片細啜送餘春

花之寺看花遇友

六卿散秩多閒官看花未必官無閒行厨自具美肴膳  
中席只苦拘衣冠我時微服偶獨出差澀不敢常公然  
沛公間道遁楚壁齊客半夜亡秦關豈期今日遇吾子  
乃復有此蕭閒仙其時花霧正冥合但見人影來褊褊  
我急避去蜨飛下君亦驚鴻勢一翩一官畏人乃如此  
細思自笑還自憐轅駒受繫無千里野鶴一舉卽九天  
明朝繳還手版向公府誰能禁我不衫不履常盤桓

謫星行

大皇大帝坐明堂南極老人主壽康千秋萬歲樂未央



張仲孝友司文昌傳說宜多男子祥用爲霖雨澤巖廊  
金門大隱笑東方潛郎白首悲馮唐蚩尤一掃十丈長  
五原忽驚諸葛亡張騫奉使牛渚旁支機贈石意有將  
惜不早勸營宣防嚴光未肯下漢皇夜半踏翻驚御牀  
伍喬處士隱廬匡嵇山謝敷同一房達也不死反怏怏  
自從撈月還帝鄉酒樓千載無詩狂今我不樂意何傷  
長庚落落夜蒼蒼

哭田季高

嵩年

京兆

季高一夜睡中忽死  
醫家俱無知其疾者

未信離魂果有之或云尸解亦疑詞明知大夢生同幻  
似此長眠死太奇縱酒初同長至日看燈不共上元期

眞成京兆田郎惜實覺延陵季子悲

感春

一官羈絆久辭家旅館驚時每自嗟  
乳鵲墮枝深院竹游魚吹浪滿池花  
登臨送目春將晚檢點收身日未斜  
好語軟紅塵土客西湖終復勝東華

悔昔游

內水於筒中置之汙溪側左右浸灌之  
三年不得入問渠何能然所恃在中實  
阿難攝登伽夫子召佛胖欲往無不可  
豈礙聖與佛以此自放蕩不復加羈勒  
三楚進妖女五陵結豪客脫帽就博徒  
開襟入歌席要於少年

場磨涅出堅白焉知二十年一墜乃幾溺途窮悔思返  
毫及知將出差慚對子弟有過不敢責畫虎實難成惟  
鵠庶可刻

送梁芷庭

章鉅

中丞撫粵

時由甘肅  
藩司升任

謝安再起爲蒼生萬里西南復此行榆柳三關辭絕塞  
桂梧十郡擁高城月明夜浦聞蜃唱雲滿春山看象耕  
聞說苗民猶苦役賴公相撫莫相驚

寄孫山人

傳聞山左隱詩人日事幽棲寄此身捲雨入簾看鵲色  
留雲護砌養龍鱗濟南社散王貽上厯下人懷謝茂秦

羨子風流能嗣起待余歸去訪松筠

倚杖

投簪竟何日倚杖復茲辰老去與人遠春來見物新  
碧桃開近眼黃鳥語翻身化理誰能會天機只是真

夏夜

螢飛點草露脚清夜涼簟席始有情入戶下簾滅燈檠  
海魚鑄石倚枕橫龜息如絲細復輕銀瓶翻水攪夢驚  
心疑三更已雞鳴窗綠未上初白生有風肅肅過樹行  
不聞鳥聲聞羽聲

放翁詩不聞水聲聞磴聲似有意擬東坡不聞人聲聞履聲之句因亦試

句擬一

蛇鼠相啖行

羣蛇捕鼠日夜急五月六月空鼠穴蜿蜒墻角時出游  
伏匿草間能影射此時蛇出雄如龍恣意啖鼠欺鼠窮  
鼠雖含怒不敢發側目看蛇蛇騰空豈知皇天奪炎燠  
萬事循環有報復秋風一起蛇無牙穴裏啾啾鼠咬蛇  
此時鼠復化爲虎頗能中傷蛇要處嗚呼蛇鼠相尋奈  
若何君不見朝來爽氣西山多

答頂梅侶

名達

博士三首

並游羿殼孰逃形一去鴻飛獨杳冥大畜利當初九位  
少微名在第三星天文掌上看經緯聖學胸中有渭涇

說與文章無用事愧余雕刻未曾停

井不與時爲冷煖錢能用世極方圓

或問居心之道余曰井以冬煖夏涼

也問處世之道余曰錢以內方外圓也問者以爲近理

近來頗復多新得待子還

同證妙詮風雨有憂常憇憇湖山無恙獨娟娟

時間陳晚香汪

小米同年不堪會閑離居後自覺西河亦已賢

先後作古

先生欲問長安事如我無鄰道已孤一寸多持扣鐘筵

千金不買失船壺水花豔豔方爭笑霜柳蕭蕭已半枯

每到悲秋思一起力微衰杖不堪扶

### 月夜懷友

晚雷過殘雨華月出芳林竹滴靜猶響蘿逕清有陰幽

花當夜發早蛩先秋吟獨坐結遐想靜言期素襟沒露  
摘瑤草據石彈清琴白雪調難合碧雲怨易深欽遲久  
不至空憶玉山岑圓暉猶未缺明夕倘相尋

和王藕塘

瑋慶

光祿種菊篇

北花無多種秋菊有佳名園人老於事辨葉能知莖我  
亦種數本軒墀爛盈盈雖非故園色頗見籬落情休沐  
值無事時來繞花行風蝶下寒影霜蛩作淒聲未免增  
感歎三逕何時成邇來人事急內外水火爭君看此花  
態端不改幽貞無言獨靜淡晚節彌孤清

答三兄寄慰

春魚孕子多滿腹一一江湖難盡育伏雞早晚抱百卵  
亦有驚雷遭破殼人生安得盡如意此理吾思已久熟  
事至其間自不堪却對落花還一哭遠勞慰語寄殷勤  
似恐老懷加煩促達觀爲借東門吳恕過不責西河卜  
子孫委蛻本非有得慰目前况已足世間尙有無兒人  
天於我厚固非薄養生送死可無憂百年且付難與穀

爰積堂

慶源

以小栗山房詩集見示

西泠十子皆詩豪後來傑出懷清高

惕西崖先生著有懷清堂稿

道

古先生不受縑樊榭老人纂刻勞

吾杭詩多出杭莖浦厲樊榭兩先生世稱

爲浙派

數子才皆足自操末流失趨胡滔滔前輩何曾誤



汝曹君今何處來翔翺大音發水聲琅璈清響切雲廢  
啾嘈十年啄菹候雞卵一理搜剔窮牛毛高者意欲追  
風騷下猶力與數子鏖西湖學士秉旌旄東南壇坫收  
英髦湖書農學士常出湖上與同人爲詩酒之社聞欲讓子得錦袍我今衰  
老才力薄焉能相與掣鯨碧海濤他年浙詩待論定或  
者得收一篇聽我寒蟲號

對雪

臘月已半麥出芽厭聽乾鵲啼檐牙天公亦憫農事苦  
昨夜一尺堆玉沙曉來推窗急起看餘勢尙作迴風斜  
大兒開門出團團踏走繞籬笆小女倚牀問格格笑語

出帳紗皇天一雪何干汝輩事見雪不啻如見花人情  
私喜有如此我亦不復爲歲嗟先春釀酒尙可及上市  
糴米應許賒雖然萬事有苦樂東家每不知西家而况  
出門一步爲天涯君知農夫原上笑啞啞不見道旁凍  
骨亂如麻縱得明年備飯甕無奈今朝推雪車

大雪寒甚

怒風捲雪空中行朔氣慘淡愁太清梅花亂潰不自色  
野鶴深藏何處聲燄落銅爐火氣絕凍合石硯冰稜生  
老夫平時戒涓滴對此滿盞還細傾

丁酉

送友游巴閬間

君今西走謁諸侯未卜巴州更聞州楚塞浮雲連野合  
蜀江春水拍天流伍胥去國空餘市王粲依人未有樓  
我亦天涯滯歸客不堪重益黯然愁

答楊生問詩何以可傳

建安而後幾成名我自難言子勉行須是古人無此語  
仍於後世有同情當時更復何書讀作者都如並代生  
且向春風閒領取花非昔態鳥今聲

嚴厚民校書圖

厚民前佐兩廣制府芸臺先生幕

娜嬛館裏好延賓名士風流子最眞爲攬英奇故留閣

自提鉛槧不離身  
枕椰夜雨挑燈靜  
荔子春風點筆新  
傳道河間門下客  
當時經術少斯人

家西林 成棟 海南從軍

梅花嶺下一樽分  
廿四橋邊不見君  
杜牧揚州初寓客  
郝隆蠻府已參軍  
抽身檀板珠槽會  
得意金戈鐵馬勲  
總是風流能跌宕  
書生事事出人羣

和海帆前輩居庸題壁詩

太行西來青濛濛  
一關屹立森當衝  
憑陵遠壓飛狐險  
犄角中分倒馬雄  
時清不用戰伐功  
關吏無事斥堠空  
八坊雲屯天廐選  
三十萬匹游牧同  
先生奉詔閱清

峻過此貪看山翠濃  
歷歷寒城明落日  
蕭蕭殘壘起秋風  
石家戰處今安在  
空有白骨埋寒蓬  
蒼茫不盡懷古意  
但覺來自荒煙暮  
靄中  
悄登高而望遠  
今可以一吐磊塊之奇  
胷  
賤子喜吟塞上曲  
短衣匹馬思從公

曉起觀鳥出巢

曉雲如水寒濛濛  
巢鳥初出無西東  
須臾羣翔入雲去  
宛若魚戲森游空  
乾坤一物有機態  
寓目可玩焉可窮  
回看忽失不知處  
前山已射朝暎紅

風

不雨已三月  
風來猶自南  
挾沙炎似火  
掩日淡於藍  
盛

世宜無此蒼生自不堪頗聞藜藿議肉食得毋慙

破硯歌爲詩舲觀察

張公子愛書勤欲死日費陶泓一斗水自從爲郎來聲  
價滿都市卽今身作繡衣臣終日依然爲人耳里中好  
事求醉帖堂下老人索判紙六年一硯又磨穿自笑生  
應作寒士公書固應日有進我喜此瓦亦厚幸君不見  
姜香銅雀來人間市兒賺得豪家錢千金什襲不敢發  
塵封匣閉恒經年一片誰爲洗銅臭不如早敝君家手

送虹江太守之鎮遠

黔中風俗何淳熙黔中山水尤清奇鎮遠自是黔門戶

形勢中分黔一支當時凌子曾守此

謂凌謙齋太守

爲言此郡

無難治太守朝朝出游樂不用高牙卷浪驚眠黎其間  
由郡入省道中有壁立千仞之迴溪攀藤附葛人跡絕  
溪行盡日惟鳥啼清風壁間出吹舟舟自移其上叢木  
森蔽虧倒影不放天光垂忽然割開朗時露一綫青蛾  
眉七里之瀧不足數九曲往往勝武夷此外一邱一壑  
佳絕處悉數尙難一二稽我時間此不覺一回首晝夜  
夢想西南飛行牽坐縛久不果遂令欲往之計今無期  
喜君遠把一麾去必逢勝處窮登躋政成早晚有餘暇  
爲余多寄黔中詩

旅館同人送王小蘋入殮

檢點棺衾備同來哭送時勿之亦有悔逝者豈無知後  
死皆吾責他生尙爾期撫孤慙豈敢當爲校遺詩

與田子文食蟹子文云恨不多生兩螯因作一  
絕戲之

黃州饒守昔曾云有蟹無監意便欣豈料涪翁還有願  
驚生四掌鼈雙褰

戲贈筆工

蘇黃皆善書於筆亦頗擇蘇惟稱諸葛獨擅天下絕黃  
於閭林輩有憾猶未釋我因語筆工何不加修飾卒然



見怪嘆子何問之失士夫自有道商賈亦有術子雖一  
書生豈不讀貨殖從來歐柳書不用逸少筆事見盧言雜說我  
非諸葛家子豈元祐客我筆正適時姿媚取衆悅焉能  
標古目而自出下策三指謝筆工子計信爲得

乞子文畫用食蟹韻

國初畫手阮亭云曾數樊圻與葉欣君有袖中周昉筆  
爲余上已寫蓊裘

子文乞以余書易畫仍用前韻

婢學夫人不足云我猶未敢學羊欣何如斂却山陰手  
完取君家白練裘

豐年行

百年眼見無此日稻米一金糶一石貧家有錢贖兒女  
行客無憂免盜賊伏臘鄉村賽社成早晚鄰里婚嫁畢  
人情歡樂我何愁要識泰來由否極轉憶從前倉卒時  
終歲何曾得飽食千家小邑常蕭條四野哀鴻紛蕩析  
鄰國惟憂水旱多疲民未免糠粃窄支持元氣幸小休  
挽回造化果誰力汝曹一日太平身 陛下萬年仁儉  
德大風有隧戒貪敗小國爲繁務省嗇常須有年思無  
年慎莫貪天天莫測

足疾累月親朋多以書來問

南方地卑恒苦溼未信北方有濕疾五月梅霖少鬱蒸  
三秋茅瘴更斷絕謂宜腰脚健可恃豈料浸淫潛入髓  
老妻頗笑衰駘佗四海多憂習鑿齒書來意厚不可酬  
問余此疾何時瘳書中還寄仙人杖謂言飲此可不憂  
我手能書筆如帚我口能飲杯作斗零丁予莫愁渠  
本不人間誇疾走